

### Кондак 1

Взбранное нам и дивное избавление даровася, Твой образ честный, Преплагословенная Дево Владычице Богородице, яко избавльшеся от злых явлением его и к нему взирающе, восписуем Ти благодарственная раби Твои, Богородице, но яко имущая державу непобедимую, от всяких нас бед свободи, да зовем Ти:

Радуйся, Радосте наша, избави нас от всякаго зла и утоли наша печали.

### Икос 1

Ангел множество, и вся Небесная Воинства славят Тебе, Царицу всех Богородицу, Ты же исполнила еси радости души наша милостивым явлением: нам образа Твоего святого, Богоизбранная Дево Владычице. К нему же кланяющеся, Тебе умиленная моления возсылаем, милосердому Твоему к нам заступлению, со страхом зовущи таковая:

Радуйся, Ты Отца Безначальнаго благословение;

Радуйся, Ты Сына Превечнаго жилище.

Радуйся, Ты Духа Святаго пребывание;

Радуйся, яко Тебе славят многоочитии Херувими.

Радуйся, яко Тебе похвальная приносят шестокрилатии

Серафими;

Радуйся, яко Тебе вся Небесная Воинства величают.

Радуйся, яко Тебе вся колена земная Матерь Божию исповедуют;

Радуйся, яко Тобою вся вселенная веселия исполняется.

Радуйся, яко Тобою вся болезни наша исцеляются;

Радуйся, Твоими бо молитвами печали наша утоляются.

Радуйся, Твоими бо ходатайствы вся прошения наша исполняются;

Радуйся, яко Тебе и Сыну Твоему в Твоей честней иконе благодарно поклоняемся.

Радуйся, Радосте наша, избави нас от всякаго зла и утоли наша печали.

### Кондак 2

Видят Тя, Богоизбранная Отроковице, вся Небесныя Силы предстоящу всегда Престолу Славы Небеснаго Царя и за христианы к Сыну и Богу молящуюся, Небесная Царице; мы же, грешнии, на земли зряще Твою святую икону и к ней припадающе, Тебе радостно поклоняемся, зовуще: Аллилуиа.

### Икос 2

Разум подаждь нам, Всеусердная Предстательнице наша, Небесная Царице, из уст бо нас скверных, како мощно пети Твоему имени? Яко благих еси нам Ходатаица, сильна еси вспомоществовати во всякой нами требуемой помощи, да Тебе со умилением зовем сиче:

Радуйся, молитвы о нас к Сыну и Богу во утешение приносящая;

Радуйся, Твоими молитвами очи наша от вечнаго рыдания избавляющая.

Радуйся, Твоими Матерними молитвами Сына и Бога на милость к нам приклоняющая;

Радуйся, Твоими молитвами праведный на нас гнев Божий  
утоляющая.  
Радуйся, Твоими ходатайствы грехи наша прощающая;  
Радуйся, Твоею помощью страсти наша истребляющая.  
Радуйся, Твоим предстательством временная наша скорби  
разрушающая;  
Радуйся, Ты во всяких бедах и нуждах нам помогающая.  
Радуйся, Тя славящих всегда прославляющая;  
Радуйся, Твоею радостью печали наша утоляющая.  
Радуйся, непрестанное нам веселие подавающая;  
Радуйся, Ты нам райския двери отверзающая.  
Радуйся, Радосте наша, избави нас от всякаго зла и утоли  
наша печали.

### **Кондак 3**

Сила Вышняго осени Тя к скорому и теплому заступлению  
верно притекающих к Тебе и честному Твоему образу  
поклоняющихся, единен бо токмо Тебе, Нетленной и Пречистой  
Богоматери, дадесе дар всякое благое наше прошение исполнити,  
и едина Ты можеш нам помощи, елико хочеш. Тем всяк возраст  
славословит Сына Твоего и Бога нашего, зовый: Аллилуиа.

### **Икос 3**

Имущи богатство милосердия неоскудное, всем концем земным  
простираеши руку помощи и подаеши болящим исцеление,  
страждущим ослабу, слепым прозрение и всем вся по своей их  
потребе исполняеши. Мы же Тебе благодарно сице поем:

Радуйся, едина Мати, милосердие нам являющая;  
Радуйся, милости сокровище многоценное нам открывающая.  
Радуйся, безчисленные щедроты всем подавающая;  
Радуйся, слово премудрости просящим дарующая.  
Радуйся, преспеяние разума юным подавающая;  
Радуйся, раны наша греховныя истребляющая.  
Радуйся, праведных в райских селениях насаждающая;  
Радуйся, отчаянным будущих благ Надеждо и Укрепление.  
Радуйся, всех падших скоро к благодати возставляющая;  
Радуйся, всем во всякой требуемой от Тебе помощи  
помогающая.

Радуйся, Радосте наша, избави нас от всякаго зла и утоли  
наша печали.

### **Кондак 4**

Бурею многих бед одержимым нам всегда помогаеши, Небесная  
Царице, с верою прибегающим к Тебе и поклоняющимся  
цельбоносней Твоей иконе, ейже первописанней иногда рекла еси:  
«С сим образом благодать Моя и сила». И мы истинно веруем, яко  
послушаеши прошения призывающих имя святое Твое и Сыну Твоему  
зовущих: Аллилуиа.

### **Икос 4**

Слыша Господь Твоя на Небеси о нас ходатайства, Избранная  
Палато Духа Святаго, исполняет Твоя прошения, мы же грешнии на  
земли, видевшие святую Твою икону, яко светозарное солнце нам  
светящуюся, Тебе яко Божией Матери дерзаем глаголати:

Радуйся, Солнце Мысленное нам являющая;  
Радуйся, светом немерцающим нас просвещающая.  
Радуйся, умерщвленных нас грехами оживляющая;  
Радуйся, неплодным матерем ложесна разрешающая.  
Радуйся, нечаянно находящих на нас злых врагов скоро  
прогоняющая;  
Радуйся, желаемых благ всегда нас наслаждающая.  
Радуйся, скоро в бедах и в печалех нас утешающая;  
Радуйся, верою Имя Твое призывающих от нечаянной смерти  
спасающая.  
Радуйся, на Тя уповающим безконечный живот дарующая;  
Радуйся, веру и любовь к Тебе имущих к Небеси возводящая.  
Радуйся, Предстательство наше крепкое;  
Радуйся, во всяких обстоятельствах нас защищающая.  
Радуйся, Радосте наша, избави нас от всякаго зла и утоли  
наша печали.

### **Кондак 5**

Боготечную звезду, честную Твою икону Ты нам показала  
еси, Владычице мира, к нейже мы зряще и верою сердечную  
молящися, Тебе, Богородице, глаголем: «Ты еси нам щит  
непобедимый и стена неборимая, вопиющим Ти: Аллилуиа».

### **Икос 5**

Видеша Силы Небесныя на руку Твоею Создавшего Своима  
рукама человеки и Владыку разумевающе Его: мы же грешнии на  
земли зряще изображенную Тебе Пречистую Матерь Его, любезно  
Свои руке к нам простирающую, к Тебе умильно зовем:

Радуйся, на руку Твоею Огнь Божественный неопально  
держашая, Имже грехи наша поपालются;  
Радуйся, на руку Твоею Света Неприкосновеннаго носившая,  
Имже души наша просвещаются.  
Радуйся, врагов наших видимых и невидимых побеждающая;  
Радуйся, любовь и милосердие к нам являющая.  
Радуйся, руке Твои в поручение о нас к Богу приносящая;  
Радуйся, вход в Царствие Небесное нам отверзающая.  
Радуйся, Твоею помощью нас защищающая;  
Радуйся, Твоим ходатайством грехи наша прощающая.  
Радуйся, Твоим молением печали наша утешающая;  
Радуйся, яко Твоим предстательством всяких благ  
наслаждаемся.  
Радуйся, яко Тобою вся во благих желания наша  
исполняются.  
Радуйся, Радосте наша, избави нас от всякаго зла и утоли  
наша печали.

### **Кондак 6**

Проповедницы Богоноснии Апостоли, по Вознесении Господни,  
при освящении храма Твоего невидимую рукою изображенный  
шаровными подобии на стене обретше образ Твой, Владычице,  
рожденному от Тебе Богу воспеша: Аллилуиа.

### **Икос 6**

Возсияла еси премудростию от Истиннаго Солнца Правды,

Богоизбранная Отроковице, и, лучи истинного Богоразумия испущающи, теми освещаеши всех верою исповедающих Тя истинную Матерь Божию быти, вопиющих сице:

Радуйся, всех на Небеси славою Твоею просвещающая;

Радуйся, начало человеческого спасения устрояющая.

Радуйся, ковчеже жизни наша, от потопа смертного нас сохраняющий;

Радуйся, в райских селениях жити нам дарующая.

Радуйся, Предстательница наша к Богу, мир спасающая;

Радуйся, в бедах сущих скоро заступающая.

Радуйся, всякия болезни человеческия, телесныя и душевныя, исцеляющая;

Радуйся, немым и косноязычным словеса отверзающая.

Радуйся, всякаго блага просящим у Тебе Подательнице;

Радуйся, учение благодати всем источающая.

Радуйся, тем всякий чин и возраст довольно услаждающая;

Радуйся, всех благия желания исполняющая.

Радуйся, Радосте наша, избави нас от всякаго зла и утоли наша печали.

#### **Кондак 7**

Хотя долготерпеливый Всевидец Господь явити Своего человеколюбия и щедрот бездну, избра Тебе Себе в Матерь, милости неисчерпаемый Источниче, да аще кто праведным судом Божиим осуждения достоин. Твоим всемогущим ходатайством сохранен будет и Сыну Твоему и Богу нашему велегласно зовет: Аллилуиа.

#### **Икос 7**

Дивна показал еси дела Твоя в Пречистой Матери Твоей, Господи, и дивну даровал еси нам Ея икону, паче лучей солнечных просвещающую людей, яко самую зрящих Богородицу, и верою сердечною от души любовь вопиющих таковая:

Радуйся, икону Твою на земли яко облак всем распростирающая;

Радуйся, тою паче надеяния милосердное к нам заступление являющая.

Радуйся, Твоею иконою источники чудес всюду источающая;

Радуйся, явлением Твоея иконы вся люди просвещающая.

Радуйся, тою новое знамение благодати в Церкви являющая;

Радуйся, яко, на икону Твою взирающе, Самой Тебе, истинней Богородице, поклоняемся.

Радуйся, иконою Твоею, яко столпом огненным, мрак греха отгоняющая;

Радуйся, тою печали наша утolahяющая.

Радуйся, Церковь освятившая тоя явлением;

Радуйся, яко мы грешнии сохраняемся Твоим заступлением.

Радуйся, вретисе скорби наша растерзающая;

Радуйся, вечною радостию нас одевающая.

Радуйся, Радосте наша, избави нас от всякаго зла и утоли наша печали.

#### **Кондак 8**

Странну и преславну в Церкви явльшуюся, святую Твою икону

Ангели воспеша, апостоли прославиша, лик святителей  
поклонишася, мы же грешнии, припадающе, ожидаем Твоея великия  
и богатяя милости, с веселием вопиюще: Аллилуиа.

### **Икос 8**

Всеми вышними и нижними владычествуяй Господь, видев Тя  
Матерь Свою всегда предстоящу Ему и со умилением Ему приносящу  
моление о нас грешных, обеща исполнити вся прошения Твоя. Мы  
же грешнии, надеяся на Твоя Матерняя о нас молитвы,  
благодарственная Тебе приносим сице:

Радуйся, с Сыном Твоим и Богом вечно царствующая;

Радуйся, Ему же всегда о нас моления приносящая.

Радуйся, всех к Тебе прибегающих, Твоею милостию  
покрывающая;

Радуйся, всех Радосте, печали наша утоляющая.

Радуйся, примирение наше с Богом соделавшая;

Радуйся, Бога и человека соединившая.

Радуйся, спасение человеческое устроившая;

Радуйся, прародительнаго греха клятву разрушившая.

Радуйся, смертное наше естество безсмертием просветившая;

Радуйся, жестокость сердца нашего умилившая.

Радуйся, отчаянных к Богу возводящая;

Радуйся, сосуды смертная, на нас уготованная,  
сокрушившая.

Радуйся, Радосте наша, избави нас от всякаго зла и утоли  
наша печали.

### **Кондак 9**

Все естество ангельское похвальныя песни приносит Тебе,  
Божией Матери и Заступнице всех припадающих Тебе и просящих  
Твоея помощи, яко твердым и крепким Твоим предстательством  
праведных веселиши, грешных заступаеши и от бед избавляеши, и  
печали утоляеши, и молишися о всех верою зовущих: Аллилуиа.

### **Икос 9**

Ветия многовещанная, яко рыбы безгласная, недоумеют  
хвалити славный, Владычице, иконы Твоея праздник, ниже от  
скверных устен наших приносимыя Ти похвалы достойны, обаче,  
неисчетныя благодеяния, иконою Твоею нам являемыя, видевше,  
душею и сердцем радуящеся, Тебе глаголем:

Радуйся, от глада нас Хлебом Жизни питающая;

Радуйся, от губительства смертнаго безсмертием нас  
соблюдающая.

Радуйся, от труса греховнаго нас сохраняющая;

Радуйся, от потопа смертнаго рукою Твоею крепкою нас  
избавляющая.

Радуйся, от огня росую молитв Твоих нас восхищающая;

Радуйся, от бед сильным Твоим предстательством нас  
защищающая.

Радуйся, от меча силою Твоею нас охраняющая;

Радуйся, от нашествия иноплеменник нас спасающая.

Радуйся, от междоусобных брани истинным миром нас  
ограждающая;

Радуйся, от смертоносных раны прибегающих к Тебе

исцеляющая.

Радуйся, от належашаго праведнаго прещения Божия Твоим молением нас свободящая;

Радуйся, от всякия нас язвы Твоим честным ходатайством изымающая.

Радуйся, Радосте наша, избави нас от всякаго зла и утоли наша печали.

### **Кондак 10**

Спасти хотя род человеческий от прелести вражия, Человеколюбец Господь Тебе Матерь Свою дарова земным на помощь, глаголя: «Сынове человечести, се Мати Моя Покров и Прибежище вам да будет, печальным Утешение, скорбящим Радование, обидимым Заступница, да всех из глубины греховныя воздвигнет, вопиющих: Аллилуиа.»

### **Икос 10**

«Царю Небесный, — тако молит за ны всегда Небесная Царица, — прими всякаго человека, славящаго Тя и призывающаго Имя Твое, идеже бывает память Святому Имени Твоему, и прославляющих Мя Имене Твоего ради, и не отрини их от лица Твоего, но благоволи в них и прими от них всякое моление, и всех от бед избави». Мы же грешнии, надеющиеся на Твоя Матерняя молитвы, зовем сие:

Радуйся, яко Ты молитвенница наша к Богу теплая;

Радуйся, яко Матерняя Твоя молитва много может, Владыку умилостивляющая.

Радуйся, отчаянных Надеждо, печали их утешающая;

Радуйся, благодатию Твоею наше недостойнство осиявающая.

Радуйся, нашу скверну чистотою Твоею очищающая;

Радуйся, моления наша благоуханием Твоим исправляющая.

Радуйся, брение наше тленное в нетление обращающая;

Радуйся, неможение наше врачующая.

Радуйся, вся наша болезни душевныя и телесныя исцеляющая;

Радуйся, нашедший на нас облак страстей, скорбей и

печалей скоро разгоняющая.

Радуйся, сильным Твоим прощением вся полезная дарующая.

Радуйся, Радосте наша, избави нас от всякаго зла и утоли наша печали.

### **Кондак 11**

Пение всеумиленное прими от нас, Небесная Царице, и молитву, приносимую Тебе, Дево Богородице, услыши: к Тебе бо в напастех, скорбех и печалех прибегаем и пред Тобою в бедах наших слезы проливаем, и молим: «Утоли наша печали, и прими сию жертву Твоих рабов, зовущих: Аллилуиа».

### **Икос 11**

Светоприемная свеча истиннаго Света сущих на земли явльшися, души просвещаеши чтущих Твоея иконы явление и к разуму Божественному наставляеши поющих Ти сиевая:

Радуйся, свеще неугасимая Огня невещественнаго, нас просвещающая;

Радуйся, заре незаходимаго Света Божественнаго, нас

озаряющая.

Радуйся, Солнце правды, нас облистующее;

Радуйся, Источник жизни райския нам источающая.

Радуйся, Мати Света Истиннаго, благочестивых души просвещающая;

Радуйся, Мати всех Бога, озлобленных всех души утешающая.

Радуйся, Тя на помощь призывающих и имя Твое славящих спасающая;

Радуйся, уповающим на Тя живота непостыдный конец дарующая.

Радуйся, всем родом, Тя Матерь Божию почитающим и Богородицу именующим, непрестанно помогающая;

Радуйся, осенением святых Твоя иконы злых духов мечтания от нас прогоняющая.

Радуйся, во внезапных на нас находящих скорбех и печалех скоро нас утешающая;

Радуйся, всему миру радость дарующая.

Радуйся, Радосте наша, избави нас от всякаго зла и утоли наша печали.

### **Кондак 12**

Благодать Божественную испроси нам у Небеснаго Владыки Сына Твоего и Бога и простри нам руку помощи, и молитвами Твоими утоли наша печали, покрый нас кровом крилу Твоею, отжени от нас всякаго врага и супостата, умири нашу жизнь, да не погибнем люте, но прими нас в вечныя крovy, Покровительнице наша, да радуешься Тебе зовем: Аллилуиа.

### **Икос 12**

Поюще Тя, державную Помощницу, хвалим Тя и, молящися Тебе со умилением, веруем и исповедуем, яко испросиши благая временная и вечная воспевающим Ти:

Радуйся, молитвами Твоими весь мир спасающая;

Радуйся, всю вселенную ходатайством Твоим заступающая.

Радуйся, православным на варвары победы подавающая;

Радуйся, нашествия на христианы иноплеменных побеждающая.

Радуйся, в вере благочестивыя сохраняющая;

Радуйся, непочитающих иконы Твоя Святых яко прах от лица земли развевающая.

Радуйся, поклоняющимся иконе Твоей и Тя на помощь призывающим, и в печалех бедствующим скоро помогающая;

Радуйся, нас грешных ко спасению и восприятию благ вечных наставляющая.

Радуйся, безконечнаго царствия у Сына Твоего и Бога нашего всем нам испрашающая;

Радуйся, верным безконечную жизнь дарующая.

Радуйся, всем во всякой потребе вся полезная и благая подавающая.

Радуйся, Радосте наша, избави нас от всякаго зла и утоли наша печали.

### **Кондак 13**

О Всепетая Мати, Небесная Царице и Владычице, Дево Богородице, рождающая всех святых Святейшее Слово, нынешнее



приемши приношение, утоли наша печали и избави нас от всяких напастей, бед, скорбей и вечнаго осуждения и грядущаго изми мучения, и сподоби нас рабов Твоих в вечных райских селениях водворитися, зовущих: Аллилуиа.

**Этот кондак читается трижды, затем икос 1-й и кондак 1-й**

**Молитва ко Пресвятой Богородице перед Ея иконой, именуемой  
«Утоли моя печали» святого Ефрема Сирина**

Дева, Владычица, Богородица, паче естества и слова родившая Единородное Божие Слово, Творца и Владыку всей видимой и невидимой твари, Единого от Троицы Бога, Бога и Человека, соделавшаяся обителю Божества, вместилищем всякой святости и благодати, в котором, по благоволению Бога и Отца, при содействии Святаго Духа, телесно обитала Полнота Божества, несравненно превознесенная боголепным достоинством и преимуществующая пред всякою тварию, Слава и Утешение, и неизреченное веселие Ангелов, царственный венец апостолов и пророков, преестественное и чудное мужество мучеников, Поборница в подвигах и Подательница победы, уготовляющая подвижникам венцы и воздаяния вечныя и боголепныя, превысшая всякой чести, честь и слава преподобных, непогрешительная Путьуказательница и Наставница безмолвия, дверь откровений и духовных таин, Источник Света, врата вечной жизни, неистощимая река милосердия, неисчерпаемое море всех боголепных дарований и чудес. Тебя просим и Тебя умоляем, сострадательнейшую Матерь человеколюбивого Владыки, будь милостива к нам, смиренным и недостойным рабам Твоим, воззри благосердно на пленение и смирение наше, уврачуи сокрушения душ и телес наших, рассеи видимых и невидимых врагов, будь для нас, недостойных, пред лицом врагов наших крепким столпом, бранным оружием, сильным ополчением, Воеводою и непреборимую Поборницею, покажи ныне на нас древния и чудныя милости Твоя, да познают беззаконные враги наши, что Сын Твой и Бог един есть Царь и Владыка, что Ты воистину Богородица, родившая по плоти истиннаго Бога, что все Тебе возможно, и чего ни восхощешь, Владычице, имеешь силу все сие совершить на Небе и на земле, и на всякое прошение даровать что кому полезно: больным здравие, сущим на мори тишину и доброе кораблеплавание. Путешествующим спутешествуй и охраняй их, пленных спасай от горькаго рабства, утешай печальных, облегчай нищету и всякое другое телесное злострадание: всех свободдай от душевных недугов и страстей, невидимыми Твоими предстательствами и внушениями, дабы, хорошо и непреткновенно совершив путь сей временной жизни, улучили мы чрез Тебя и оные вечные блага в Царстве Небесном. Верных, почтенных страшным именем Единородного Сына Твоего, уповающих на Твое предстательство и на милость Твою и во всем имеющих Тебя своею Ходатаицею и Поборницею, укрепляй невидимо против окружающих врагов, разсей облако уныния, облегающее души их, избави их от душевного утруждения и подай им светлое благодушие и радость, возстановив мир и безмятежие в сердцах их. Спаси молитвами Твоими, Владычице, сию Тебе преимущественно посвященную паству, весь город и страну, от голода, землетрясения, потопления, огня, меча, нашествия иноплемеников, междоусобных брани, и всякий праведно



подвигшийся на нас гнев обрати, по благоволению и благодати Единородного Сына и Бога Твоего, Ему же подобает всякая слава, честь и поклонение, со Безначальным Его Отцем, с совечным и животворящим Его Духом, ныне и всегда, и во веки веков! Аминь.

#### **Молитва иная**

Надеждо всех концов земли и рабам Твоим (*имена*), Ты, Пречистая Дево, Госпоже Богородице, утешение наше! Не гнушайся нас, грешных, на Твою бо милость уповаем. Угаси в нас пламень греховный и покаянием ороси изсохшая сердца наша, очисти ум наш от греховных помыслов; прими воздыхание от души и сердца мольбу Ти приносящих. Буди о нас Ходатаица к Сыну Твоему и Богу, и укроти ярость Его праведную Матерними Твоими молитвами. Душевные и телесные язвы исцели, Госпоже Богородице, утоли болезни душ и телес, утиши бурю злых нападений вражеских; отыми бремя грехов наших и не остави нас до конца погибнути. Ты бо еси возведение человеческому роду, в печали скорая Помощница. Мати истинная Христа Бога нашего, помогай нам, грешным рабам Твоим всегда, и ныне и присно и во веки веков. Аминь.

#### **Тропарь Пресвятой Богородице перед Ея иконой, именуемой «Утоли моя печали»**

##### **Тропарь, глас 5:**

Утоли болезни многовоздыхающия души моя, Утолившая всяку слезу от лица земли: Ты бо человеком болезни отгоняеши и грешных скорби разрушаеши, Тебе бо вси стяжанием надежду и утверждение, Пресвятая Мати Дево.

##### **Кондак, глас 6:**

Не ввери мя человеческому предстательству, Пресвятая Владычице, но прими моление раба Твоего, скорбь бо обдержит мя, терпети не могу демонскаго стреляния, покрова не имам, ниже где прибегну окаянный всегда побеждаемь, и утешения не имам, разве Тебе Владычице мира, упование и предстательство верных, не презри моление мое, полезно сотвори.

##### **Ин кондак, глас 6:**

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти: ускори на молитву, и потщися на умоление, предстательствующи присно, Богородице, чтущих Тя.

#### **Величание**

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

[Празднование 25 января/7 февраля](#)